

Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit inatsit pillugu Naalackersuisut allannguutissamik siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaalilluni § 2 Inatsisartut inatsisaanni Kalaallit Nunaanni Inatsisartunut qinersisarneq pillugu inatsisip assinganik aalajangersagaqaleqqullugu.

(Inatsisartunut ilaasortaq Malik Berthelsen, Siumut)

Akissuteqaat

(Nunami Namminermi Pissutsinut, Pinngortitamut Avatangiisinullu Naalackersuisoq, Anthon Frederiksen)

Siullermeenera

Inatsisartunut ilaasortaq Malik Berthelsen, Siumut, kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu inatsisartut inatsisaata allanngortinneqarnissaanut Naalackersuisut siunnersuummik saqqummiussaqaarnissaat pillugu Inatsisartut aalajangiiffigisassaattut siunnersuummik saqqummiussaqaarpoq, taamaalillutik kommunalbestyrelsinut qinersisussat Kalaallit Nunaata avataaniikkallartut Inatsisartunut qinersisarneq assigalugu assinganik pisinnaatitaaffeqalissammata.

Inatsisartunut ilaasortaq kommunalbestyrelsinut qinersinermut atatillugu qinersisartunut Kalaallit Nunaata avataaniikkallartunut qinersisinnaatitaanermut aamma sumi najugaqarnissamut piumasaqaatit pillugit naleqquttumik siunnersuuteqarpoq.

Inatsisartunut ilaasortamit ilumoortumik tikkuarneqarpoq ullumikkut qinersisarnermut inatsisit ilusaat imaammata, qinersisinnaanermut aammalu sumi najugaqarnermut piumasaqaatit assigiinngissuteqarlutik, taamaalilluni qinersisartunut Kalaallit Nunaata avataaniikkallartunut kommunalbestyrelsimut aamma Inatsisartunut qinersisinnaatitaasunut piumasaqaatit sanilliullugit allaanerussuteqarlutik.

Naalackersuisut inatsisartunut, kommunalbestyrelsinut, nunaqarfinni aqutsisunut ilagiillu sinniisaannut kiisalu Pituffimmi innuttaasut siunnersuisoqatigiivinit qinersisarnermut inatsisit tamakkerlugit misissorlugillu nalilersorpaat, tassanilu siunertaavoq naleqqussaasoqarnissaa nutarterisoqarnissaalu, taamaaliornikkut qinersinermut inatsisit Namminersorlutik Oqartussat eqqunneqarnerisa kingorna pissutsinut naleqqussarneqassammata.

Naalackersuisut apeqqut Inatsisartunut ilaasortap Malik Berthelsenip saqqummiussaa ilisimavaat, tamannalu suliap ingerlateqqinnissaanut ilanngunneqarumaarpoq.

Naalackersuisut kissaatiginartippaat siunnersuut aappassaaneernejartinnagu Inatsiseqarnermut Ataatsimiititaliami sukumiisumik suliarineqarnissaa.